

E siwenzegjärege erënnert sech u seng Kannerzäit zu Koplescht

Esou geschriwen, wéi déi Kopleschter nach viru
60-70 Joer geschwat hunn

Wat än als Bouf vum Krich behalen huet

Déi éischt kloer Erënnung, déi ech hunn, gät zrëck op den 10. Mä 1940 – ech wuar diemols zwä an en hauleft Joer al - wou d'Preise Lëtzebuerg iwerfaul hunn. An zwar gesinn ech dien Dag – et kaun esou géint 10 Auer mueres gewiescht sinn - ënnen um Schmidden Eck, mä op deeër anerer Säit vun der Strooss, virun Thiboossen, wou et an den Eck era gät, e Motorrad mat enger "Siddekäerchen"stouen. Dernieft zwou Gestaulten a laange Mäntel, mat Schakoen um Kapp, an ä vun hinnen huet bestänneg matt eppes wéi engem Fändel gewéinkt. Hien huet de Camionen an de Päerdsgefierer vun der Wehrmacht – déi a laanger Kolonn vum Bridel eräif kouw sinn - Zäache ginn, dass se

soulte oppassen, well de Schmidden Eck – mä dat soult ech eréischt vill méi spéit gewuer ginn – dat wuar eng Kéier, déi ä besser hat gemittlech ze huelen. Ech kau mech och nach erënnere, dass virun all Hausdir d'Lëtt op der Strooss stungen an dass kën eppes gesot huet. Ech muss soen, dass ech déi gaunz Saach zimlech intressant fount hunn, och wann ech ëmmer näs op déi Siddekäerchen matt deenen zwou, bis op e klengen Ausschnëtt vum Gesiicht, komplett agemummt Gestaulten op Schmidden Eck hu misse kucken. Déi zwéin, déi wuar mir net geheier, mä d' Zaldoten, déi nieft de Päerdsween gaange sinn oder op Gefierer souzen a gesongen hunn, dat hunn ech schéi fount. Wann eben net déi zwéin um Schmidden Eck gewiescht wieren. Déi hunn ech gefuaart. An déi gesinn ech elo nach, nobäi 70 Joer méi spéit, däitlech viru mir.

